

REVISTA SITUASAUN MARSU 2015

ASUNTU NE'EBÉ PRESIZA TAU ATENSAUN

- ▶ **Komandu Operasaun Konjunta (KOK) HANITA Kontinua Buka Grupu Ilegál Iha Munisipiu Baukau**
- ▶ **Mane Ida Taa Mate nia Mane Foun Tanba Lakohi ba Tribunal**
- ▶ **Eis Grupu Arte Marsiais Tuda Malu Durante Semana Rua Iha Comoro**

KOMANDU OPERASAUN KONJUNTA (KOK) DUNI GRUPU ILEGÁL IHA MUNISIPIU BAUKAU

Insidente iha Postu Administrativu Baguia iha loron 9 Marsu 2015, tuku 03.00 madrugada: grupu deskoñesidu soe molotov ba postu PNTL, rezulta membru PNTL na'in 4 kanek todan, inklui eskoltu Prezidente Parlamentu Nasionál, ne'ebé fó seguransa ba Prezidente Parlamentu iha serimónia funeral família iha Baguia. Grupu ilegál mós sunu karreta trek ida, estraga karreta STAE ida no loja ida. Insidente ida ne'e deskonfia halo husi eis grupu Konsellu Revolusionáriu Maubere (KRM) ne'ebé lidera husi Mauk Moruk.

Atu hatán ba asuntu ida ne'e, Konsellu Ministru halo enkontru extra ordinária no deside hodi estabesele Komandu Operasaun Konjunta ho hanaran HANITA, kompostu husi PNTL no F-FDTL hodi kaptura lider no membru grupu ida nee no lori ba prosesu legal. KOK kaptura ona membru grupu ilegál atus rua resin, maibé maioria husik ho kondisaun (bebas bersyarat) tanba la hatudu prova iha envolvimentu ba apoiu movimentu grupu refere, balun hetan de'it "Termu Identidade Residencia" (TIR). Postu Administrativa Baguia la inklui iha area kobertura programa "Atensaun no Responde Sedu" (AtReS) nian, la inklui Postu Administrativa 43 ne'ebé area kobertura AtReS nian no informasaun iha leten (liga ba akontesimentu iha area Postu Administrativa Baguia), AtReS laiha dadus rasik so foti de'it husi monitorizasaun media nian.

Total insidente Fulan Marsu 2015	
Distritu	Insidente
Aileu	3
Ainaru	8
Baukau	9
Bobonaru	3
Covalima	2
Dili	36
Ermera	3
Lautein	4
Likisá	4
Manatutu	2
Manufahi	2
Oekusi	4
Vikeké	3
Total	83

Maske operasaun ne'e estabesele hodi aseguara seguransa nasional maibe realidade iha terrenu, liu-liu husi Karta "Sirkular Komandu Apoiu" hasai iha dia 9 Marsu 2015 husi PNTL, ba area Munisipiu Baukau, Lautein, Vikeké no Manatutu, hatudu katak operasaun ne'e limita movimentu komunitade. Insidente ida mak akontese iha Laga, Monitor AtReS rekolla hanesan tuir mai ne'e.

Iha loron 22 Marsu 2015, iha tuku 10.00 kalan, iha Aldeia Heu - Uai, Suku Soba, Postu Administrativa Laga, akontese ema deskoñesidu mai ho karreta Hilux, taka dalan ho fatuk boot iha dalan direasaun Postu Administrativa Baguia ba Postu Administrativa Laga, Munisipiu Baukau. Ema deskoñesidu taka dalan ne'e tanba KOK sira sei lori no tula membru KRM liu husi estrada ne'e. Informasaun ne'ebé verifika husi Polisia Eskuadra Laga katak, iha kalan bainhira komunitade sira tuur hola anin mak sira haree estrada ho direasaun ba Baguia nakonu ho fatuk boot, depois komunitade kontaktu keda ba Polisia, tanba estrada ne'ebé KOK uza hodi halo movimentu buka tuir grupu Mauk Moruk ho nia elementu sira. Ho akontesimentu ne'e, halo mós komunitade sira ta'uk no pániku. Iha momentu ne'e keda, Polisia Eskuadra Laga no Task Force to'o keda iha fatin akontesimentu, maibe la identifika ema ne'ebé taka dalan tanba sira halai tiha.

RIAN IDA TAA MATE NIA MANE FOUN TANBA LAKOHI BA TRIBUNAL

Iha fulan Marsu, insidente akontese entre "membru família mak hahu halo violénsia", rekolla hamutuk 9, kategoria número terseiru. Kategoria número primeiru mak "joven" hamutuk 28 insidente no segundu mak "toos/animal na'in" hamutuk 10 insidente. Ezemplu insidente ida ne'ebé membru família mak hahu halo violénsia, hanesan tuir mai ne'e.


Iha loron 18 Marsu 2015 iha oras tuku 2.00 lokraik, katuas ida taa nia rian to'o mate iha aldeia Laikara, Suku Maina II, Postu Administrativu Lautein. Insidente akontese tanba mane foun lakohi ba hatán iha Tribunal Baukau, bainhira Tribunal hasai ona karta hodi mai hatán kazu nia baku nia fen iha tinan 3 liu ba. Tanba mane foun lakohi ba Tribunal, rian hein nia iha toos hodi taa iha ain depois nia monu, taa tetak tan ninia isin lolon. Mane foun ka mane ne'ebé hetan taa, koñesidu tanba nia involve kazu oho Padre, Madre no jornalista iha 1999 iha Lautein. Polisia ba halo atusaun no lori rian ba sela no lori mate isin halo autópsia iha Ospital Nasionál Guido Valadares Dili. Mate isin entrega ona ba família maibe rian ne'ebé oho mane foun nee sei hein prosesu legal.

EIS GRUPU ARTE MARSIAIS TUDA MALU DURANTE SEMANA RUA IHA COMORO


Maske grupu Arte Marsiais tolu hanesan IKS, PSHT no KORK ofisialmente governu taka ona husi rezolusaun governu No. 16/20013, maibé realidade iha terrenu, konflitu bazeia ba eis grupu arte marsiais mosu nafatin. Iha fulan Marsu, númeru insidente liga ba arte marsiais hamutuk 5, iha fulan Fevreiru 2 no fulan Janeiru 2. Insidente iha kraik ne'e hanesan insidente ida ne'ebé akontese dala neen iha fatin hanesan.

Iha loran 3 Marsu 2015, iha tuku 12.00 kalan akontese joven sira tuda malu iha Aldeia Metin IV, Suku Comoro, Postu Administrativa Dom Aleixo. Joven sira ne'e mai husi Grupú Arte Marsiál ne'ebé Governu bandu tiha ona atu halo sira nia atividade. Insidente tuda malu ne'e rezulta uma rua hetan tuda estraga odamatan no janela. Insidente tuda malu ne'e akontese hamutuk dala neen, komesa iha dia 21 Fevreiru, depois dia 3, 7, 8, 9 no 10 Marsu. Joven sira ne'e sempre uza tempu kalan tuku 12.00 no dadeer madrugada tuku 03.00 hodi tuda malu. Problema ne'e mós hetan intervensaun husi Polísia Eskuadra Comoro no iha loran kuarta 11 Marsu 2015 hamutuk ho Autoridade lokál kria diálogu entre grupu joven no simu malu fila fali ona.


KARATERÍSTIKA INSIDENTE




Insidente Fatin




Metodu Violensia



Tipu Violensia




Se Mak Hahu / Halo Violensia




Saida Mak Ema Hahu Violensia Nia Jeneru




Se Mak Vitima Nia Jeneru




Hun no Abut Konflitu



Se Mak Responde





ATIVIDADE PREVENSAUN NO RESPONDE BA KONFLITU

Atividade Ne'ebé Hala'o Husi Ekipa Atensaun no Responde Sedu (AtReS)

- ▶ Ekipa AtReS halo Soru-mutu ho membru RPRK Postu Administrativa Uatulari no hasoru malu ho stakeholder iha Uatulari iha dia 23 Marsu. Objetivu soru-mutu nee mak atu halo diskusaun kle'an liga ba asaun dame ne'ebé RPRK propoin ka halo planu asaun bazeia ba konflitu ne'ebé akontese iha Suku Makadiki. Iha tempu hanesan mós halo enkontru badak ho Administradór Postu Administrativa Uatulari no Adjuntu Komandante Eskuadra Uatulari, liga ba servisu Belun no asuntu konflitu baibain ne'ebé mosu iha Uatulari. Rezultadu importante no planu tentative mak RPRK prontu atu realiza Serimónia Kulturál ba dame iha Suku Makadiki Postu Administrativa Uatulari iha dia 30 Abril 2015.
- ▶ Ekipa AtReS halo soru-mutu ho membru RPRK Maubisse iha dia 30 Marsu 2015. Enkontru ne'e hodi rona direktamente rekomendasaun husi Administradór Postu Administrativa Maubisse, liga ba Tara Bandu ne'ebé atu realiza iha Suku Maubisse, Postu Administrativa Maubisse. Iha tempu hanesan, vizita mós Komandante eskuadra Maubisse hodi rona sira nia hanoin liga ba proposta atu realiza Tara Bandu iha Suku Maubisse. Rezultadu importante husi soru-mutu nee mak sei realiza enkontru hodi rona husi Suku 9 sira seluk no lia na'in sira oinsá Tara Bandu bele aplika ba Suku 9 iha Postu Administrativa Maubisse no la'ós iha Suku Maubisse de'it.

Atividade Ne'ebé Hala'o Husi Ekipa Mediasaun no Rezolusaun ba Disputa (MRD)

- ▶ Halo apresentasaun dadus kona-ba disputa rai iha Timor-Leste husi perspetiva Sociedade Sivil iha Gabinete do Prezidensiál, Ai-tarak Laran, Dili iha dia 3 Marsu 2015. Partisipa iha soru-mutu ne'e mak hanesan Administradór munisipiu 13,

Komandante PNTL husi munisipiu 13, sociedade Sivil no korpu diplomátika sira. Sai oradór iha soru-mutu mak Sekretáriu Estadu ba Teras no Propriedade, Parlamentu Nasionál husi Prezidente Komisaun A, Xefe Departamentu Polísia Komunitária, no MRD Belun. Iha tempu hanesan, apresenta mós dadus AtReS nian ne'ebé liga asuntu rai ba toos/natar no rai ba uma.



- ▶ Iha dia 12 Marsu 2015, iha Suku Kribas, Postu Administrativa Manatutu, realiza sosializasaun kona-ba alternativu rezolusaun disputa no habelar informasaun kona-ba vantajen no dezvantajen rezolusaun disputa rai liu husi mediasaun no Tribunal. Total disputante ne'ebé partisipa iha enkontru ne'e hamutuk na'in 50, feto na'in 6 no mane na'in 44, partisipa mós Xefe Suku, Xefe Aldeia sira hotu, Konsellu do Suku, OPS no membru comunidade balun.

KONA-BA REVISTA NE'E

Revista situasaun ne'e relatu kona-ba asuntu xave relaciona ho insidente violénsia no tendénsia husi koleasaun dadus monitorizasaun liu husi Sistema Atensaun no Responde Sedu (AtReS) Timor-Leste durante Marsu 2015. Belun esforsu atu fahe informasaun ne'ebé up-to-date no serteza ho dadus atuál. Hanoin katak, bele hetan mudansa situasaun ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dadus ne'ebé ami iha liu husi sistema AtReS.

Marília Oliveira da Costa, Jestor Sistema AtReS: bylah.belun@gmail.com

Laurensius Lein, Espesialista Prevenaun Konflitu & Polítika: laurensius.belun@gmail.com